

तुबारि संपादकीय
टीम

♦अस इ उम्मिद करूं लगे से कि एण बाड़े रोज अन्तर सुआ मेहणु इस कम अन्तर सहयोग कते।

♦इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पढ़ू जे इ पत्रिका शुरू कियो असी।

♦तुबारि एक अवाणिज्यिक पत्रिका भो।

♦तुबारि पत्रिका कोई मेहणु, जनजाति, त संस्कृति गलती कहेण जे नेई छपाण लगे। अगर कोइ ई सोचता बि त अस जिम्मेवार नेई।

♦छपाणे पेहले सोब आर्टिकल दुई टाई पांगेई मेहणु हरालो असे। इ त खुलि बोक असी कि पेहली बार पांगवाडी लिखणे सुआ मुशकिल भुन्ती त गलती बि भुन्ती। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

♦आर्टिकल ना मिलए, या घाटि मेहणु के मदद ना मिलए त तुबारि पत्रिका कदि बि बंद भुई सकती।

♦कोई चीज छपां असी या नेई छपां जे तुबारि संपादकीय टीम पुरा अधिकार असा।

♦अस किलाड केन्द्रीय पुस्तकालय, त बजार राबे ठेके भेएडे हरिरामे दुकान अन्तर तुबारि ड्रॉप बॉक्स पुठ बि अपुं सुझाव त आर्टिकलस रखुं जे सुविधा कियो असी।

♦अस सोबी पांगेई मेहणु जे हात जोड़ कइ निवेदन कते कि, तुस बि कोई अच्छा आर्टिकल, पुराणी या नोवी कथा, कहावत, कविता, त नोवे घीत (पंगवाडी अन्तर) लिख कइ छपां जे हेन्न दिए।

तुबारि संपादकीय टीम

9418431531

9418429574

9418329200

9418411199

9418904168

9418721336



मे हियंता

शरमा सिंह

यक यदगार हियुंत रेहि घेन्ता तु में चेतें अन्तर

मोउं चेतें नेई तेई, कीं ला मोउं पुठ मंतर।

तें चेतें अन्तर अभेई अउं की कता?

तें चेतें अन्तर अब अउं बाहर उंघता, घुरुम पोणि नेई भोसुरे पोणि पीन्ता।

तती कॉफी नेई पर थम्स-अप पीन्ता। निघि ज्याकेट नेई पर टी- साँट लांन्ता।

रोज सानुहू कता त चा घट पीन्ता। बन्येन त अपु खोपुड़ फोटान्ता।

तें चेतें अन्तर अउं चेरें तकर लहाड़ बिश्ता।

धार घेन्ता त ठनु पोण पींता।

गी त बिशिनतु नउ अब, अउं रोज डलण जे घेन्ता।

लहाड़ त न किढ़ता अब, त अउं बग कमूं जे घेन्ता।

जुकारु, घुरेई जाठ त न लगती अब, त अउं डेक लाई कइ

जाठ लान्ता।

गीहे बाड़े पातर त अब ना देन्ते, त अउं ठेके घेई बिश्ता।

मोउं उडारण जे जहाज त अब न एन्ता, मरते डुलते अउं चाहम पुजता।

तें ई हाछा कार्पेट त सरकार ना दी सकता, अब खा त घोड़ि पुठ हंटण पड़ता।


खांजे त मेतु अब्बल अब्बल, पर अब अउं न मस्तिन्ता।

अब अउं कोठि अन्तर न बिश्ता। दाढ़ी मुंछे न लमीण देन्ता।

अउं अपु दुवार ना खुड़कता, पर उघाड़ रखता।

त दुआ कता 'एई गा दुबारी, ए हियुंता।

किस कि तोउ केईआं अउं ना रज्जिन्ता।



दाँदू कथा

दाँदू धूप बिश कइ सोचुण लगे थिया कि आज गभुरु

कोठि रेहि गे। तपल गभुरु बोते, 'दाँदूआ नमस्ते।' दाँदू बोता,

'गभुरो! कोठि थिए अपल तकर, होर अतो हल्ला किस? तेन्हि

बोलु, 'असी सोभि मी कइ पालटि की। रुपेई घठ भोई गे, त

असी दुकानदार केआं समान उधार निया।' तोउं बोलु, 'दाँदूआ


अब असी यक कथा शुणए।' ई शुण कइ दाँदू खुश भोई गा।

'गभुरो शुणे! आज अउं तुसी यक खलीफे कथा शुणांता।



यक खलीफा थिया। से बोडा न्याय करणेवाड़ा त अब्बल मेहणु थिया। खलीफा दिन भई राज मेहले कम हेरता त ब्यादी अपु कमे बदले धियाड़ी हिसाब जोई सरकारी खजाने केआं टाई मोहर घिन घेन्ता। गीहे खर्च हिसाब जोई से रकम सुआ घठ थी। यक रोज खलीफे बेगमे तसे छने-आरे कियु, कि टाई रोजे धियाड़ी तुस पहलेई घिन ऐईएल त

ईद पुठ गभुरु जे नउए झिणे घनते। बेगमे छने-आरे शुण कइ खलीफे जवाब दुतु, 'तैं मगुण ठीक असु। पर अउं शुई तकर जीता ना रेहा त राज्य कर्ज कोउं भरता? पहले तु खुदा केआं में जिन्दगी टाई रोजे पटटा लिखवाई कइ घिन आई। तदिया पता अउं टाई रोजे धियाड़ी उधार घिन एन्ता।' तसे बेगम कैई एस बोकि कोई जवाब न थियु। तोउं दादु बोलु,



'गभुरो! पालटी करीण या मी कइ खुशी मनाण खरु असु। पर अपु जेब खर्च अन्तरा, उधार नी कइ ना। कोई ई कम ना करे जेसे बेलि तुं बोडी शरम भोई घिएल। सोब गभुरु सोहो करे कि दश रुपेई बुचा अठ रुपेई खर्च कते त दुई रुपेई बचाई रखते जे कि जरुरते टेम पुठ कम एईएल।' त गभुर बोलु 'दाँदूआ! असी माफ कइ छइ। इदिया पता अस कदि ई कम ना कते।'

रणापे राणि कथा

Source: Anonymous

यक गां यक पंच थिआ। से ना भगवान मन्तथ ना केसे मेहणु हेर डरतथ। तस गां यक रणापे राणि बि भुन्तिथ। तसे केसे होर जुओई झगड़ा भो थिया। त से रणापे राणि पंच केई घेई कइ बोती कि में नरहा-करहा करिणं दिए। जे पंच भगवान ना मानता होर मेहणु हेर ना डरताथ से कि रणापे राणि हेर कइ खाक डरता ना? त से बिचारी रोज के बोतिथ 'में पंची करीण दिए बे, कोया! में पंची करीण दे।'



पेहले पेहले त पंचे तस पुठ ध्यान ना दिता। पर जीं दिन बितते गा त तेस जिल्हाणु हेर कइ तस लेहर एई घेन्तिथ। से रणापे राणि बिचारी तसे दुवार अगर दिन भई बिशती रेहन्तीथ।

पता यक रोज भ्यागे से पंच सोचता कि 'ओ यारा, बेशक अउं ना भगवान ना मेहणु हेर डरता, फिर बि इ रणापे राणि पंची कइ छंता। ना त आ रोज इठ एई एई कइ मोउं तंग कइ छांन्ति। त तेन तेस रोज पेहले तसेरी पंची कइ छड़ी।

इस कथा अन्तर शिचणे बोक इ असी कि भाई असी कदि बि हार ना मानीण। अगर अस धिरज जुए काम कते रेहन्ते त जरुर कामयाव भोई घेन्ते।

दाँद अपु पोतुर जे बोलुण लगो असा

बबीता चौकी

तैंई अउं तंग किया ना, अउं तउ कच्चा-कच्चा खाई छता।



कच्चा-कच्चा कीं खांता?
तैं त दंते नेई।

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574



एडस बीमारी इन्सान जोई यक लिंगि सम्बन्ध बणाणे बोलि केसे बी एडस एई घेन्ता... काँडोम सिर्फ 18% सुरक्षा कता... एडस मेहणु के जिसम अन्तर कम से कम 7 केआं 10 साल तकर कोई लक्षण नजर न एन्ते।